

**PAS akan siasat, tidak bertindak terburu-buru, kata Setiausaha Agung
Malaysian Insider
Aug 14, 2014**

PAS tidak akan terburu-buru mengambil tindakan terhadap dua ahli dewan undangan negerinya (Adun) yang menyatakan sokongan terbuka kepada Datuk Seri Dr Wan Azizah Wan Ismail menjadi menteri besar Selangor tetapi akan menyiasat perkara ini.

"Kita akan menyiasat perkara ini dahulu," Setiausaha Agung PAS Datuk Mustafa Ali berkata kepada The Malaysian Insider sambil berkata, perbincangan terdekat akan dibuat malam ini melalui Lajnah Politik PAS, biro paling utama dalam parti Islam itu.

Mustafa mengulas tindakan dua Adun PAS berpecah dari pendirian keseluruhan PAS dan menyokong Dr Wan Azizah menjadi menteri besar menjelang mesyuarat AJK PAS Pusat Ahad ini.

Adun PAS Hasnul Baharuddin (Morib) dan Saari Sungib (Hulu Kelang) bertindak menyertai sidang media Dr Wan Azizah hari ini, memberikan beliau sokongan majoriti dalam DUN Selangor iaitu 30 dari 56 ahli.

Hasnul dan Saari antara pemimpin dan Adun PAS yang tidak menyertai mesyuarat Badan Perhubungan PAS Negeri Selangor yang diadakan di Shah Alam semalam.

Ekoran tindakan mereka berdua berpecah dari kelompok besar PAS, desakan demi desakan dibuat ahli PAS agar kedua-dua mereka dipecat.

Dalam kenyataannya di majlis pengumuman sokongan itu, Saari berkata, beliau sedia menghadapi sebarang tindakan dari PAS.

"Saya yakin pendirian saya hari ini tidak melawan dasar PAS kerana parti saya sebelum ini telah menyatakan sokongan penuh kepada Pakatan," kata Saari kepada media sambil menegaskan tindakannya bertujuan untuk memastikan Selangor terus kekal di tangan Pakatan Rakyat.

Ketua Pemuda PAS, Suhaizan Kaiat dalam kenyataannya melalui Facebook mendesak Setiausaha Agung PAS memanggil kedua-dua Adun berkenaan segera.

Beliau juga menegaskan, Umno tidak perlu bermimpi untuk bersama PAS. "Kami akan bersama Pakatan seperti ditegaskan oleh Presiden dan Majlis Syura Ulama," katanya.

Selepas mesyuarat Lajnah Politik malam ini, mesyuarat penuh AJK PAS Pusat akan diadakan Ahad ini bagi membincangkan isu menteri besar Selangor. – 14 Ogos, 2014.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/pas-akan-siasat-tidak-bertindak-terburu-buru-kata-setiausaha-agung>